

【擲牙齒】陳美燕原作

頭擺個時代，生活環境無現下恁好，衛生教育還唔普遍，大家對保護牙齒個觀念也無恁詳細。像佢，就朝晨頭跣床搓一擺牙齒定定，嘴又豺<sup>1</sup>，當好食糖仔；故所，佢對自家做細人仔個時節，輒輒牙齒痛個印象當深。

牙齒一痛啊起來，會收人個命哩！細人仔噉到噉殺天<sup>2</sup>，大人無結無煞。該央時無麼個止痛藥，阿姆喊佢：「冷水含等！毋好緊噉！」講越噉會越痛。背尾，換牙齒該下，阿姆吩咐佢：試著舊牙有一滴仔搖，就愛用舌嫵緊𠵼<sup>3</sup>，續等，兩支手指拈等牙齒搖分佢𠵼，做毋得羊噉<sup>4</sup>驚痛。若係毋煞猛牯搖，等新牙暴出來無位仔好企個時節，「歸口牙齒生到歪哥泊杈<sup>5</sup>，該就媿哩啲！」阿姆逐擺恁樣嚇佢。

細門牙旁脣該兩支「虎牙」也盡重要，阿姆講無較細義兜仔，暴出尖尖翹翹個「豬哥牙」來，該就壞蹄地哪！成時，佢看

<sup>1</sup> 豺：音 saiˋ；嘴饞、貪吃的樣子。

<sup>2</sup> 噉殺天：音 veˋ vɔŋˋ sadˋ tienˋ；高聲呼叫。

<sup>3</sup> 𠵼：音 teˋ；用舌頭往外推。

<sup>4</sup> 羊噉：音 ionŋˋ veˋ；嬌慣，動輒大叫。

<sup>5</sup> 歪哥泊杈：音 vaiˋ goˋ qi ca；歪斜不正。

佢懈懈怠怠<sup>6</sup>、無要無緊樣仔，將就拿一條白車線，膠吾牙齒綯綯，出力一掙<sup>7</sup>，牙齒就跣等白線飛出來咧。上齡<sup>8</sup>擲著個牙齒，腳愛企比比<sup>9</sup>擲去眠床下；下齡擲著個愛擲上屋頂，講恁樣牙齒生著正會齊。

記得佢有一支後角個大牙，係分做「撮把戲」個人擲忒個。該央時，佢讀小學兩年生，有戲班仔來莊頭做戲兼賣藥仔。佢兜賣一種止痛藥水，講牙齒痛個時節點落去做得止痛，牙齒擲忒了後來點，較遽收口止血。佢問現場個細人仔：「有麼儕個牙齒𠵼𠵼無？佢膠佢擲毋使錢呢！」佢緊講緊行到吾面前。奇怪哩，佢就無講愛分佢擲啊！佢嘎喊佢嘴擘擘打開開，擎一支鈇仔，手腳伶俐就膠吾牙齒擲忒咧。背尾佢想，定著係企在後背個阿姆偷偷膠佢講個。

到較大來，了解牙齒個重要性，曉得細心細意注意牙齒個健康。當愛靚個佢逐擺看著自家個牙齒生到齊齊無歪忒，正知愛感謝阿姆該央時恁有耐心教佢。

<sup>6</sup> 懈懈怠怠：音 hai hai tai tai；懶散不勤勞。

<sup>7</sup> 掙：音 duiˋ；用力拉特定對象，使其脫離原本所在的位置。

<sup>8</sup> 上齡：音 song ngamˋ；上顎。

<sup>9</sup> 企比比：音 kiˋ beˋ beˋ；站齊。

【學騎車】李雪菱原作

講著騎自行車，係佢最好个啦，三不二時都騎等車仔上上下下，下課轉到屋下，書包仔一揸<sup>1</sup>，就去尋車仔來騎。係無，心情就慍慍悴悴，做麼个都懶蛻蛻仔<sup>2</sup>。

該日仔天時盡好，佢心肝肚歡歡喜喜跔等阿姆去運動公園，緊騎車就山歌溜天緊唱歌，路項看著一個阿爸教厥俵仔學騎車仔，大汗過細汗扶等自行車緊走，還大聲緊喊：「佢愛放手吔，佢愛放手吔。」實在哪有放手呢！

這分佢恹起頭擺學騎車仔个時節，該央時阿公身體還當健，毋知哪條腸仔直了，講愛教佢學騎車仔，同後斗个輔助輪仔剝忒，喊佢騎上去。阿姆哀啲！佢噉噉滾盡噉，頭磬磬仔<sup>3</sup>看等腳踏仔愛箭佢，車頭嘎顛顛倒倒<sup>4</sup>毋知愛幹去哪仔？驚到面啖青<sup>5</sup>，阿公在後尾緊喊：「看頭前，看頭前，佢捉等後盤，你柔柔仔騎就做

得。」就恁仔，像連續劇樣仔，橫倒過跋跔起來再騎，緊噉緊騎，阿公淨會同佢衫褲拔拔啊，看有鑪著無？看有流血無？過繼續向前騎，害佢噉到目汁濫泔盡衰過喔！

經過一朝晨个特別訓練，像海軍陸戰隊个蛙人恁艱苦，總算學會吔。還騎去展分阿婆看，害阿婆嚇一下，目珠擊到大大粒。又過風神碌天<sup>6</sup>騎去分隔壁鄰舍个細人仔看，展風神。毋過阿公手軟腳犁<sup>7</sup>，坐在地泥項氣凹凹仔<sup>8</sup>緊啟大氣，頭先喊佢个氣猛毋知哪去吔？

轉到屋下阿公同佢講：頭擺愛學騎車仔無恁簡單，愛去同人租，半點鐘五個銀，歸家个細人仔共下學，大个扶細个輪流騎，下把仔無細義橫到烏青鼓血，噉到嘴扁扁仔毋敢聲，大人儕無閒泊杈<sup>9</sup>無法度搭你，總講細人仔天生天養，橫到大噉到大，就自自然然學會吔。

到這下見看著人學騎車仔，當像看著阿公扶等自行車後盤个手，分佢安安心心，總感覺著無離開過，今還燒燒暖暖在吾个心肝肚。

<sup>1</sup> 揸：音 fid`；丟。

<sup>2</sup> 懶蛻蛻仔：音 nan` guai` guai` e`；意興闌珊。

<sup>3</sup> 頭磬磬仔：音 teu` qin` qin` e`；低頭的樣子。

<sup>4</sup> 顛顛倒倒：音 dien` dien` do do；醉醺醺的，喻騎不穩的樣子。

<sup>5</sup> 面啖青：音 mien gab qiang`；因恐懼而臉色發白。

<sup>6</sup> 風神碌天：音 fung` siin` lug` tien`；洋洋得意。

<sup>7</sup> 手軟腳犁：音 su` ngion` giong` lai`；形容疲累異常。

<sup>8</sup> 氣凹凹仔：音 hi ngiab` ngiab` e`；氣喘吁吁的。

<sup>9</sup> 無閒泊杈：音 mo` han` qi ca；形容忙得不可開交。

【打極樂仔】黃家馨原作

頭過，佢盡惱落兩天，見看著天時轉烏陰，阿姆就會喊佢摺衫褲收落屋肚，又吩咐佢續手摺摺啊。當好出去搞个佢，就像分天公關到屋肚共樣，當毋甘願，摺衫褲儘採拗一下，譴孜孜仔<sup>1</sup>看等窗門外背落無停个雨，阿爸看佢嘴嘟鼻翹，問佢：「你在該譴麼个？看你个嘴脣皮做得吊三斤豬肉囉！」佢摺阿爸講：「天公真實摺佢做對頭，昨晡日先生愛考佢兜走八百公尺，佢緊拜託佢落大雨，結果一滴雨就無，還出大日頭，害佢熱到險橫忒；今晡日係拜六，佢想愛去打球仔，佢嗷拚大雨，佢真實會分佢譴死！」

阿爸行落間肚，拿出幾隻極樂仔，隨手摺極樂仔儘採紫一下，在廳下輕輕仔拂啊出，一隻、兩隻、三隻，逐隻就揜當穀，佢看到當入文，目盯盯仔、嘴擘擘仔毋敢啟氣。過一下仔，阿爸又拿三條幼線一頭緝在凳頂，一頭用手拉纏，摺地泥下紫好線頭个極樂仔，一隻一隻擲到幼線頂，三隻極樂仔就像在該走相逐仔，各儕一條線，完全無交雜，佢暢到無結煞，緊拜託阿爸教

佢。

「有心打石石成磚，無心打井井無泉。」佢認真跔阿爸學幾擺，就曉得搞了！佢用左手拿等極樂仔，摺線頭放上去，左手手指公揜等線頭，用右手開始紫線仔，頭兩圈定著愛擲纏，續下來紫等下，紫到伸三股一股个時節就做得了，換右手尾指纏兩輪，用右手拿好極樂仔，左腳踏頭前，右腳在後背，右手頭前後背晃幾下，看準目標，右手到頭前个時節出力擲啊出，極樂仔就開始揜揜轉了！

打極樂仔个時節，看等極樂仔揜揜轉，成時會打斜，佢兜會用索仔在邊脣憑一下，極樂仔黏時就變正了；成時緝一條幼線，分極樂仔從這頭行到該頭，像教極樂仔行路樣仔，正經當生趣！阿爸講：「人生乜係恁樣，愛行自家正確个路，毋罅力个時節，用索仔在邊脣督一下，極樂仔就會揜較遠；打斜抑係行歪个時節，用索仔教極樂仔變正，像阿爸長透教你做人个道理共樣。」

這下，隨在佢天公幾時愛發風落雨，幾時愛出日頭，佢乜無相干了！佢顛倒愛承蒙天公爺落大雨，分阿爸毋使出門做事，做得摺佢做伴，緊打嘴鼓、緊搞極樂仔，真實當生趣！人生像極樂仔共樣，緊揜緊揜，各人行自家个路，承蒙爺哀、先生摺朋友，輒常在邊脣督醒佢，牽成佢，有佢兜个用心指導摺鼓勵，佢正有信心去打拚，正毋會行差路！

<sup>1</sup> 譴孜孜仔：音 kien` zii` zii` e`；形容生氣的樣子。

【阿咪<sup>1</sup>】李夢花原作

吾屋下從來就毋識畜狗畜貓，一來係阿姆歸日仔做事無閒泊杈，又愛無閒煮三餐，二來係佢當愛淨俐，畜狗仔同貓仔驚怕會遭跳蚤。一直到老弟間房个天篷頂，逐暗晡一群老鼠在該走來走去，呼呼磅磅<sup>2</sup>吵到佢睡毋得，正高不將同上屋个鄰舍，捉一隻細貓子畜來打老鼠。

鄰舍个貓嫲這胎正養兩隻，一隻就係吾屋下這隻，灰色間<sup>3</sup>白色同豬肝色花刺花刺<sup>4</sup>，看起來當精靈、當得人惜，佢兜喊佢「阿咪」。另外該條柑仔色間白色，乜異靚，分雜貨店个叔姆捉去畜。阿爸講新捉來个貓仔，定著愛綯到有四支桌腳个下背幾日仔，恁樣正會認屋，阿爸就摻佢綯到桌腳下。正經有影哦！幾日仔放佢，阿咪就乖乖，毋會儘採走。

因為毋識畜過貓仔，阿姆乜毋知愛分佢食麼个？人講：貓愛食臊。阿姆就用四破魚攪飯飼。一站仔過後，阿爸講：「毋好分

佢食忒飽，慣勢咧就毋會去打老鼠。」聽雜貨店个叔姆講厥屋下該隻，就係食到肥固固仔，日日食飽睡、睡飽食，連老鼠在脣頭過，佢就目珠擘開睜一下，做佢睡。該幾日逐朝晨，阿爸就去豬砧買一坵豬肝分阿咪食。第一擺豬肝買轉來，阿姆愛拿來煮熟，阿爸煞煞講：「分貓仔食生豬肝，係愛佢慣食生个味緒，正會去打老鼠，該下二擺佢打著个老鼠，你愛煮熟正分佢食係無？」阿爸講个異有理，佢兜聽了哈哈大笑。

阿咪日時頭走到倉庫睡目，暗晡頭就係佢行動个時間，在暗摸脣疏个暗晡頭，看著佢个目珠仁，像兩粒青色个寶石樣仔當金當靚，灶下个黃蚩趨來趨去，佢一爪搭一隻，非常流掠。就毋知佢曉打老鼠無？毋過，自阿咪來了以後，老弟間房个天篷，就無老鼠在該跳舞哩。

毋多知仔，阿咪畜有十四年咧，照佢人个年齡換算，佢有七十零歲哩。該日阿咪懶甥甥仔無精神，食个東西又嘔出來，好得看過獸醫注射過，幾日仔就好吧。阿姆笑笑仔對阿咪講：「你同佢共樣，老咧。」阿咪當像聽得識樣仔，第二日打隻細老鼠挑挑放在灶下，像係愛摻阿姆講：「莫笑佢老刀嫲無鋼——奈毋何，佢還異慶哪！」動物除了毋會講話，佢兜同人共樣，係有感情有靈性个，還有該種毋認老个打拚精神啊。

<sup>1</sup> 阿咪：音 a' mi；貓的名字。

<sup>2</sup> 呼呼磅磅：音 bin bin bong bong；狀聲詞，形容老鼠在天花板跑動的聲響。

<sup>3</sup> 間：音 gam；摻雜調和。

<sup>4</sup> 花刺花刺：音 fa' la' fa' la'；花色混雜。

【大箍牯減肥記】曾菁怡原作

「哇！歸桌仔恁多好料仔！汽水、餅仔、披薩、雞卵糕、枝仔冰，還有佢盡好食个焗菜、雞髀<sup>1</sup>。」佢看到無瞞目，口涎水強強會跌下來，該兜好料仔像同佢撲手講：「遽遽來食，遽遽來食唷！」佢煞煞抓一支香噴噴仔个雞髀，該油亮油亮个皮焙到喇喇，肉汁汀汀汀汀，實在還錫人哪！就在佢嘴擊到大大，準備咬啊下去該下，嘎聽著：「大箍牯，還毋跣床？讀書會赴毋掣哩！」全部个好料仔一下仔嘎毋見忒，原來，係發夢啊！有一息仔毋願，該雞髀無咬著，實在還打爽哦！

聽吾姆講，佢從細就異好嘴斗，生到肉卒卒仔，幼皮白肉，盡得人惜。公太就盡愛撚吾面頰卵，講佢像正打好个粿粿仔分人想愛咬一口。原本佢無感覺肥固固个身材有麼个毋好，但係該擺見笑个經驗分佢堅心愛減肥哩。

該日學校辦校慶活動，吾班級表演「三隻細豬仔」个話劇，佢係擔任豬大哥个角色。就在節目進行到豬大哥同豬二哥為著閃避大野狼，愛走去豬老弟个屋仔園該下，為著有緊張个氣氛，佢

盡命牯颯過去愛鑽入豬老弟个屋仔裡肚。麼人知，一下忒大力，豬老弟个屋仔嘎分佢撞橫下去，佢還仆在屋仔面頂，屎肫翹到半天高，緜繃繃仔个褲弓到暴線縫……。該時，鬧熱煎煎个禮堂忽然間變到一片恬靜，佢還聽得著自家砰砰砰个心跳聲，額頭流下來个汗水每一滴佢就感覺得著……，實在還見笑哦！愛仰結煞正好？落尾，有聲音摻佢解圍哩，佢遽遽企起來行到舞臺脣換褲；該聲音，毋係佢期待个拍手聲，係大家笑到歸身仔緊顫、目汁雙流个笑聲。

校慶結束該日，桌頂个乳茶、雞排全部分佢擲到垃圾桶，佢第一擺有恁強个決心，絕對愛減肥成功。佢去網路尋減肥个方法，大體係減量、減油、減糖，還愛配合適當个運動，故所該兜油漬漬仔<sup>2</sup>个焗菜、甜濟濟仔<sup>3</sup>个汽水、糖仔全部分佢拒絕，逐餐飯菜都食較清較齋兜仔，食到七分飽就好。佢還每日運動三十分鐘，行路、打球仔、跳索仔……，逐日做無共樣个變化。

一隻月過後，吾姆帶等佢去買新衫褲，每一領个尺寸都減兩號，阿姆講：「從今以後做毋得過喊你『大箍牯』咧。」「係啊！你愛喊佢『緣投哥』哩。」

大箍牯減肥，成功！

<sup>1</sup> 雞髀：音 gie' bi'；雞腿。

<sup>2</sup> 油漬漬仔：音 iu' ji ji e'；形容沾滿了油。

<sup>3</sup> 甜濟濟仔：音 tiam' ji' ji' e'；形容味道甜膩。

【 蛎蜃仔<sup>1</sup> 】徐姿華原作

記得讀二年生該年，連續漚雨<sup>2</sup>幾下禮拜，落到人都硬硬會生菇哩！直直到拜三朝晨正斷雨腳<sup>3</sup>，當晝放學還有日頭花對貴貴個烏雲肚箭出來，大家都當歡喜，排列行出學校門。著等水靴仔、蠻皮個細俵仔就開始涉水<sup>4</sup>搞，泥水激到脣項個細妹同學吱吱滾，緊閃、緊跳、緊走，笑聲、鬧聲、罵人聲，跔等轉好個天時，大家個心情也像慢慢仔散忒個烏雲緊來緊開。

佢同老弟轉到屋面前個楓樹伯公下，看著一陣細細隻、頭大大、烏烏個魚仔在路脣落雨過後個細水窟肚，洩來洩去當生趣。佢兩儕跔等看到毋記得好轉，阿婆等無佢兜，行出禾埕大聲咻，佢兜正真毋甘願個行轉屋下。

佢兩儕晡著阿婆去睡當晝個時節，偷偷仔拿等空個乳粉罐仔，去楓樹伯公下捉魚仔。驚大人知著會罵，佢兜就同捉著個六尾魚仔，偷偷仔畜在書桌下，愛去上課同放學轉都會先去看一下，等愛寫字個時節正同佢兜拿出來放在桌頂，陪佢兜寫字。

第三日打早，老弟去看魚仔了後赴等愛去上課，乳粉罐仔無

放好勢嘎橫忒，等佢兜下晝轉到屋下，水硬硬會流淨咗，罐頂淺淺個水肚伸著一尾魚仔定定，另外五尾魚仔燥死在書桌仔下咧。佢兩儕當傷心，同五尾魚仔埋在花園肚個桂花樹下，希望佢兜做得鼻得著桂花個香味。伸著該尾細魚仔，佢兜就過較細心細意照顧佢，大約一禮拜換一到水，還分佢食嫩嫩個菜葉仔。

十外日過，該尾魚仔嘎生出兩支腳，佢兜試著魚仔會生腳當生趣，忍毋核偷偷仔同阿爸講，阿爸看咗講：「該毋係魚仔，係『蛎蜃仔』、蛎仔個細人仔。」差毋多又過一禮拜，蛎蜃仔又生出前腳哩，佢有四隻腳還有尾，在水肚洩來洩去，當風神。

學校放暑假哩，阿姆同往年共樣帶佢兜轉姐婆屋下寮一禮拜，佢兜心肝肚掛吊等書桌下個蛎蜃仔，旨曾旨<sup>5</sup>就緊討愛轉。一轉到屋下，老弟黏時蹤入間肚，跔等就噉到大嫲聲，佢兜赴毋掣攞包袱仔，就煞煞走入間肚去，看佢做麼個噉？老弟指等空空個乳粉罐仔，同脣項個跳啊跳個蛎仔，噉到緊發噎<sup>6</sup>，講：「嗚……蛎蜃仔……，分蛎仔食忒咧啦！嗚……」，阿爸聽著，緊掌老弟個頭那，忍等笑同老弟講：「大戇俵，若蛎蜃仔大哩，變做蛎仔咧啦！毋係分蛎仔食忒。莫噉啦！」，老弟聽著恁樣講，正轉笑面。

因為童年畜「蛎蜃仔」個經驗，分老弟對自然科學當有興頭，這下老弟既經係當受學生仔歡迎個自然科先生，也輒輒會帶細人仔滿哪仔去做研究呢！

<sup>1</sup> 蛎蜃仔：音 guai` ngiam e`；蝌蚪。

<sup>2</sup> 漚雨：音 eu i`；下很久的雨。

<sup>3</sup> 斷雨腳：音 ton' i` giog`；久雨終於停了。

<sup>4</sup> 涉水：音 zeb sui`；腳踏入水中。

<sup>5</sup> 旨曾旨：音 mang` qien` mang`；時候未到。

<sup>6</sup> 發噎：音 bod` ed；哭得喘不過氣來。

【剃頭】張美容原作

前幾日仔去剃頭店剃頭，看著一個兩、三歲个細人仔，為著剃頭噉到噉殺天<sup>1</sup>，大人細子全部都搥到汗流脈絡，實在還衰過哪。佢這下較大咁，剃頭該下毋敢噉，毋過還係恁驚剃頭，乜共樣恁惱剃頭！

佢驚剃頭，係因為佢當無膽，驚師傅手項該支剪刀膠剃頭刀。見擺一坐落凳頂，圍好剃頭帕，看著師傅擎等剪刀對等佢，佢就開始幅幅掣<sup>2</sup>，試著過忒千年恁久頭那毛正剪好，正想愛敵一下大氣定定，師傅又擎等利利个剃頭刀愛來刮吾腦之背<sup>3</sup>个毛腳，這下還較得人畏哩。佢驚到頸根緊鉤、尿肱在凳頂扭來扭去，師傅緊刮緊咄<sup>4</sup>佢毋好停動，無奈何，佢牙根齧等、拳頭嫵搭等，由在人剝割。係走得得，佢定著起腳滑走<sup>5</sup>，一分鐘就毋停跔。唉！剃頭實在得人驚！

到三、四年生起勢，膽較在<sup>6</sup>哩，無恁驚剃頭，嘎變做惱剃

頭，因為師傅該張嘴當得人惱，佢總係在膠佢剃頭該時節，講講掣一千擔有个無个。可能大家係老鄰舍倘<sup>7</sup>熟事咁，佢長透緊剃緊同佢打嘴鼓，一下仔問：「若頭那毛落麼个肥，仰會生到恁靚、恁多？」一下仔又講：「營養毋好專門搥到頭那毛去，愛食較高大大兜仔正有影哪！毋好像矮嫵車樣仔矮佢佢仔<sup>8</sup>。」佢面皮薄、驚見笑，長間目珠眨等詐無聽著，一肚懊惱<sup>9</sup>想：「仰結煞！脣頭个人定著在該笑佢咁啦！還惱！還惱！實在還惱剃頭。」

最冤枉个係，有一擺師傅毋知仰仔，剪刀一溜<sup>10</sup>，嘎膠吾个耳公剪溜皮，跔等就出血。師傅緊同佢膏藥仔，緊嘍嘍咿咿講：「頭那毛恁多，當毋好剪。」仰形嘎變做佢毋著！轉到屋下想愛同阿姆做嬌，無想著阿姆毋單淨無安慰佢，顛倒罵佢講：「毋恬恬坐等分人剃哪！耳公無分人剪忒就異好哩。」限勢佢愛噉毋得嘴扁，聽著阿姆恁樣講，黏時「哇」一聲噉出來。係做得，佢甘願鬢頭絞髻<sup>11</sup>也無愛去剃頭。

剃頭个齣事，幾隻月就愛再過來一擺，還艱苦哪！佢日日想、日日望，想望煞煞大，做得像大人恁樣，去電毛店剪頭那毛，腳交等，有冷氣好吹、有人同你捉龍，還有人滄茶分你食，毋知幾好哪！

<sup>1</sup> 噉殺天：音 ve<sup>ˇ</sup> vong<sup>ˇ</sup> sad<sup>ˇ</sup> tien<sup>ˊ</sup>；高聲呼叫。

<sup>2</sup> 幅幅掣：音 bid bid cad<sup>ˇ</sup>；不停發抖。

<sup>3</sup> 腦之背：音 no<sup>ˇ</sup> zii<sup>ˊ</sup> boi；後腦杓。

<sup>4</sup> 咄：音 doi<sup>ˇ</sup>；喝斥。

<sup>5</sup> 起腳滑走：音 hi<sup>ˇ</sup> giog<sup>ˇ</sup> vad zeu<sup>ˇ</sup>；拔腿就跑。

<sup>6</sup> 在：音 cai；穩固。

<sup>7</sup> 倘：音 tiong<sup>ˇ</sup>；太。

<sup>8</sup> 矮佢佢仔：音 ai<sup>ˇ</sup> dud<sup>ˇ</sup> dud<sup>ˇ</sup> e<sup>ˇ</sup>；矮嘟嘟的。

<sup>9</sup> 懊惱：音 au nau；懊惱。

<sup>10</sup> 溜：音 tiu；滑開。

<sup>11</sup> 鬢頭絞髻：音 nung<sup>ˇ</sup> teu<sup>ˇ</sup> gau<sup>ˇ</sup> gi；蓬頭散髮。

111 年全國語文競賽客家語讀者劇場文本國小組（四縣腔）

編號 62 號

【秘密森林】林貴珠原作

佢從細盡好在山林肚、河壩脣搞寮，一到放寮日就一哪仔野上野下搞到斷烏正轉屋，記得讀小學該下，總係好跔阿娥厥姆去美濃山下拈樵。阿娥厥爸盡早就過身咗，單淨倚恃厥姆做小工來畜一屋大細，阿娥盡知人我，放寮日都會跔厥姆去山肚拈樵相添，佢輒常跔衫尾，同佢兜共下去山林肚遠寮，對佢來講這座山林肚全全寶。

打早佢就帶等飯籠仔同佢兜共下去，在山林肚佢兜搞園分人尋，同這一大片个山林變做佢兜个運動坪縱上縱下<sup>1</sup>，在樹頂蹶上蹶下無輸山猴仔，麼个愁慮早就飛走哩，飛到天仔恁高，佢个心情就像著等靚靚花裙在該跳舞个揚蝶仔，飛上飛下恁自在、恁快樂。走到汗流脈落就去山坑脣搞水，山坑水清又清、啱一口透心涼，坑水涼又甜，較贏雜貨店个枝仔冰。續等貶石頭捉蝦公、捉毛蟹、捉魚仔，唱等佢自家个山歌，快樂个歌聲跔等坑水傳遍歸隻山窩壩壁，流過莊頭，流到闊野野个天際。

成時會有膨尾鼠來做伴，厥面頰卵蠕蠕動看等佢兜手項个零

嗒，錫到厥口涎水強強就會跌下來哩，盡得人惜；還有領領拜个山狗太，佢看你，你看佢，成時又自家搞到四腳惹天，盡生趣。行到笏竹頭下聽著唧唧滾个聲音，佢兜就摻手項銅笏仔裝湊个水灌入地泥个空仔，無幾久就看著另外一個空仔趟出土狗仔來，一隻、兩隻下擺仔做得透著三、四隻个土狗仔。搞到瘰哩坐在香絲樹下，山風柔柔吹過樹林，聽等土狗仔唧唧滾挨弦仔，山坑水同笏竹和出大自然个樂曲，這係最錫人聽个大自然音樂。

暢樂个時間總係恬恬仔溜啊過，一瞞目就到斷烏哩愛轉屋咧，猴嫲背等猴子攀籬吊壁愛轉竇，佢兜就踏等紅霞下山，貓頭鳥咕咕滾同佢兜講：「正來寮！」阿伯姆揸等滿滿个幸福，佢乜袋等湊湊个快樂轉來，感謝這座山林加添佢生趣又無共樣个童年生活，感謝一路里來陪等佢成長个好山好水，對佢來講搞上搞下毋當美濃山下，這係吾心肝肚最靚个秘密森林。

<sup>1</sup> 縱上縱下：音 jiung' song' jiung' ha'；跑來跑去。



【像戇仔个天才】葉秋菊原作

「人不可貌相，海水不可斗量」這句話來講阿明，實在盡對般<sup>1</sup>。佢乜相信天公爺同你關忒一扇門，定著會摻你打開另外一扇窗。

見擺佢兜愛重新分班該下，心情就像老鼠跌落米缸肚，一重歡喜一重愁，歡喜个係做得熟事新朋友，愁个係毋知會有仰仔个人同佢共班？當記得開學該日，遠遠看著一個手癩癩腳跛跛个細俵仔行落教室肚，該儕人頭臥臥仔，嘴弛弛仔<sup>2</sup>緊行緊笑，看起來戇戇，佢胚想佢怕係行毋著教室咁，愛去隔壁个資源班正著！

該細俵仔的對<sup>3</sup>坐在吾隔壁。先生特別同大家介紹這細俵仔，講佢安到張忠明，手腳較毋方便，愛打幫坐在厥脣頭个人，發揮同學愛，搵手照顧。張忠明？佢話著<sup>4</sup>係當聰明，險險笑出聲來，一想著新个一年愛同佢比比坐，面就孬忒<sup>5</sup>一半。佢頭側側仔偷看佢，唉！係生到白淨白淨異清秀个細俵仔，總係透日仔口涎水澹

澹汀汀<sup>6</sup>，摻頸根圍等該條涎丫仔<sup>7</sup>，汀到潦潦，分人看著目汁就會跌出來，同情心在吾心肝肚慢慢仔翻轉，佢定定仔幹轉頭同佢笑一下，佢試著佢異得人惜咧！

吾該班个綻剝頭<sup>8</sup>總係撩撩刁刁，奈冬瓜毋何，捉瓠仔來捋毛，看忠明好欺負，就學佢行路孔孔翹翹个樣仔，無就去撚厥屎舂，好性个阿明就目瞞瞞仔任人搵射，佢一肚个懊躁，當想行前去代佢出頭。

阿明當有志氣，同佢兜共樣上課，共樣寫作業，就寫字較食力，較慢板定定，學生仔該當愛做个本分，佢毋識懈怠過。有一日上數學，先生出一隻題目難過上天，吾頭那想到必乜想毋出來，大家都額結結仔無人曉，哪會胚著阿明竟然毋使兩分鐘就算出來。大家目珠擎到大嫲粒，盆頭講到鉢乜無人愛信，戇仔仰會變精咁呢？原來佢係一個天才啊，起先話著佢係戇仔个佢敗勢到面紅濟炸，還想尋一隻空鑽落去唷！

見擺看著搞到昏天暗地毋知頭天个佢兜，同拿等隨身聽恬恬聽英文、嘴項迪迪凸凸背出一大串英文个佢，就會面紅，實在爭天差地啊！人講「一枝草一點露」，天公爺係公當个，雖然無分佢健全个圓身，毋過有分佢聰明个頭腦、上進个心，在未來个路項，大家都毋使為佢煩惱為佢愁哩！

<sup>1</sup> 對般：音 dui ban'；契合、一致。

<sup>2</sup> 嘴弛弛仔：音 zoi ie' ie' e'；嘴咧得開開的。

<sup>3</sup> 的對：音 dag dui；正巧。

<sup>4</sup> 話著：音 va do'；以為。

<sup>5</sup> 孬忒：音 fe' ted'；歪了。

<sup>6</sup> 澹澹汀汀：音 dam' dam' din din；形容液體不停的自物體上滴下來。

<sup>7</sup> 涎丫仔：音 lan' a' e'；圍在脖子上的圍兜。

<sup>8</sup> 綻剝頭：音 can dog teu'；罵人頑皮鬼。

【賣菜】謝惠如原作

記得讀三年生該下，屋下人多食用乜多，阿姆除忒做田事還愛打理屋下人个三餐，故所利用屋側角該空地來種菜，種啊種欸，菜嘍多到食毋去，將就載去街項賣。

九冬十月禾仔割忒後，一個奈日阿姆愛偌跣佢去搵賣菜，去到菜市場个路脣，阿姆頓好自行車，同後斗疊到尖起來个角菜，下十過抓<sup>1</sup>下來喊偌在該掌等賣，無講橫無講直佢自家又隨載去街項迂等來賣也，攞偌一儕人在該呆呆，毋知愛仰結煞正好。

偌本成就面皮薄，見看著毋識个人就會面紅濟炸，莫講愛喊人買菜，無結無煞个偌，敗勢到頭犁犁仔，全毋敢臥起頭來看人，好得隔壁賣番薯个老伯姆看偌恁恬又畏羞，笑笑仔講：「細阿妹仔，毋使驚，你做你大聲喊賣菜，人家聽著就會掇轉來看你賣麼个，無定著有佢想愛買个菜，鴨嫲嘴乜罔吮正有好食，來！偌喊分你聽：『來唷！來買番薯唷！好食个番薯，粉又甜哦！包你食也還會倒轉來買唷！』」聽著老伯姆个喝賣後，偌就膽膽仔試喊啊：「來唷！來買菜哦！一抓十個銀定定。」正喊啊煞，一

個阿姨人聽著隨停下來買，還說偌恁乖恁曉得。聽著佢个阿謔，偌暢到緊喊緊大聲，行過吾面前个人，十個有八個大體會停下來同偌買菜，無幾久就賣忒也，分偌試著賣菜一息仔都毋會難。

冬下頭日仔短，臨暗仔放學轉到屋下，鞋一脫衫一換，跣等就走去菜園同阿姆搵摘菜。暗晡頭食飽夜後，同阿哥兩儕開始擇菜、秤菜，偌兜負責个事頭，除忒愛同一頭一頭仔有黃葉還過燥葉个菜蓋仔<sup>2</sup>擘忒以外，還愛膠有泥个菜搵淨來，整理好勢也，正一抓一抓仔秤畀平重縳起來。阿姆不時吩咐偌兜：「有東西好賣，斤兩定著愛罇，雖然正十銀八角又乜係錢，秤頭就係路頭，毋好去梟批人。還有賣食个東西，自家愛敢食个正好拿去賣人。」這兜話偌全記在心。

賣菜雖然係一種小生理賺無麼个錢，也無麼个大學問，毋過對這擇菜、賣菜个過程裡肚，分偌學著盡多做人做事个道理。

<sup>1</sup> 下十過抓：音 ha` siib go za`；解下十多把。

<sup>2</sup> 菜蓋仔：音 coi hab` e`；指所有蔬菜外層較老較黃的葉子。

【鬧熱个落雨天】曾菁怡原作

鬧鐘仔鈴、鈴、鈴<sup>1</sup>響哩！大嫲聲喊佢遽遽趺床，再過忍床就會赴毋掣去學校讀書哩啲。佢目西西仔伸手去揪忒鬧鐘，又過橫落眠床，捨毋得摻佢分開。欸！毋係天光咗？外背仰會還係暗摸胥疏？探頭看往出，原來係天公派烏雲來通知佢兜——愛落雨哩！

有人認為落雨天係麻煩天，出外愛著水衣仔，無就擎遮仔，一無細義衫褲又會涿到濕漉漉仔，愛去哪仔都毋方便。學生仔盡惱無法度出去打球仔、搞寮，一下課就會分先生掌等，麼人都做毋得出去涿雨，故所見看啊著落雨，大家就唉唉唧唧，眼盯盯仔看等雨水號等歸隻个運動坪，實在還愠悴哦！

毋過，落雨天對佢來講顛倒係異鬧熱个日仔。朝晨頭一出門，滿街路都係淦淦个車仔，這片嘩嘩、該位叭叭，像久見个朋友相借問樣仔，大家相賽尖共下講起恁久無看著个思念。該兜行路个人，擎等一支支个遮仔花，分雨水淋啊過，跔等就開出各色个花彩，揆去揆轉像在該比看麼人个花較靚樣仔。你係同佢聽較

<sup>1</sup> 鈴：音 liang；擬聲詞。模擬鈴聲。

真兜仔，該雨水打在車仔頂、屋頂、水窟仔還過樹葉仔頂高个聲，全部都無共樣，有高音、有低音，有大聲、有細聲，像係在該唱歌仔分你聽樣仔。成時，雷公還會用曠燼來打燈光，用響雷公來和聲，恁樣講起來，係毋係異生趣？

佢盡好在落雨天打早就去學校，因為該兜平常時圓核核个蠅螺仔<sup>2</sup>、蠓公全部都會趟出來搞水。學校个圍牆<sup>3</sup>係紅毛泥作个，壁項生个溜苔青里里仔，落雨該下，蠅螺仔趟上趟下陣打陣，相賽看麼儕蹶較遽，有个彎來幹起做起畫圖个藝術家，有个停跔在圍牆頂高享受分雨涿个清涼、逍遙、還過自在。

落雨天出來搞寮个蠓公盡好膽，衫褲無著就緊拚拚仔走出來搞水，溝壩肚朗朗滾个水流緊沖等來佢也毋驚。有幾下尾蠓公分水沖啊去還會搖來擺去，暢到奈毋得。有个蠓公大擘擘仔趟到路項來，較砸身个還做得趟轉去；較媿个將就橫在路徑頭，分天公做主哩！

鬧熱个落雨天，有人懊惱，有人歡喜，天公無法度合每一儕人个意，佢就愛自家改變想法，不管麼个天都係盡好个天。

<sup>2</sup> 蠅螺仔：音 se<sup>ˇ</sup> lo<sup>ˇ</sup> e<sup>ˋ</sup>；蝸牛。

<sup>3</sup> 圍牆：音 tu<sup>ˇ</sup> xiong<sup>ˇ</sup>；圍牆。